

Diyakini dapat meneruskan kecemerlangan UMK, UMP dan UniSZA

Tiga universiti dapat NC baharu

Oleh MOHD. HUSNI MOHD. NOOR

PUTRAJAYA — Kementerian Pengajian Tinggi (KPT) semalam mengumumkan pelantikan tiga naib canselor (NC) bagi tiga buah universiti berkuat kuasa semalam.

Menterinya, Datuk Seri Dr. Noraini Ahmad berkata, universiti terlibat ialah Universiti Malaysia Pahang (UMP), Universiti Malaysia Kelantan (UMK) dan Universiti Sultan Zainal Abidin (UniSZA).

Katanya, Datuk Prof. Dr. Yuserrie Zainuddin, 60, dilantik NC UMP, Prof. Dr. Razli Che Razak, 59, (UMK) dan Prof. Dr. Fadzli Adam, 50, (UniSZA).

"Dr. Yuserrie sebelum ini adalah Timbalan Naib Canselor (Hal Ehwal Pelajar dan Alumni) UMP dan berkelulusan Ijazah Sarjana Muda Sains Sosial dari Universiti Sains Malaysia (USM) serta Ijazah Sarjana dalam bidang Perdagangan dari University of Wollongong, Australia.

"Beliau juga pemegang Ijazah Kedoktoran dalam Pentadbiran Perniagaan dari Universiti Kebangsaan Malaysia (UKM)," katanya dalam satu kenyataan.

Noraini memberitahu, Dr.



KPT mengumumkan pelantikan tiga NC baharu UMP, UMK dan UniSZA berkuat kuasa semalam.



YUSERRIE

RAZLI

FADZLI

Razli pula berkelulusan Ijazah Sarjana Muda Statistik Ekonomi dari UKM, Ijazah Sarjana Sains dalam bidang Penyelidikan Operasi dari University of Strathclyde, United Kingdom dan Ijazah Kedoktoran USM.

Katanya, beliau sebelum ini adalah Timbalan Naib Canselor (Hal Ehwal Pelajar dan

Alumni) UMK.

"Dr. Fadzli pula sebelum ini adalah Timbalan Naib Canselor (Penyelidikan dan Inovasi) UniSZA dan berkelulusan Ijazah Sarjana Muda Ilmu Wahyu dan Warisan Islam dari Universiti Islam Antarabangsa Malaysia.

"Beliau mempunyai Ijazah Sarjana Sastera (Teologi dan Pengajian Agama) dan Ijazah Kedoktoran dalam Pengajian Islam dari University of Leeds, United Kingdom," ujarnya.

Noraini berkata, semua NC dipilih oleh Jawatankuasa Tetap Pemilihan Naib Canselor Universiti Awam.

"Kementerian percaya dengan ketokohan, kredibiliti dan pengalaman yang dimiliki oleh ketiga-tiga naib canselor baharu ini mampu menggalas tanggungjawab dan meneruskan kecemerlangan institusi berkenaan," katanya.

Sehubungan itu, KPT mengucapkan penghargaan kepada bekas NC UMP, Prof. Ir. Dr. Wan Azhar Wan Yusoff, Datuk Prof. Dr. Noor Azizi Ismail (UMK) dan Datuk Prof. Dr. Hassan Basri Awang Mat Dahan UniSZA atas sumbangan mereka sebelum ini.